

VENDIM
Nr. 256, datë 21.12.2020

MBI FILLIMIN E PROCEDURËS PËR MIRATIMIN E “RREGULLORES PËR INTEGRITETIN DHE TRANSPARENCËN E TREGUT ME SHUMICË TË ENERGJISË (REMIT)”

Në mbështetje të nenit 16, 19, 20, germat: “ç” dhe “d”; të nenit 22, 51, pika 2, germa “dh” dhe 97 pika 4, të ligjit nr. 43/2015, “Për sektorin e energjisë elektrike”, të ndryshuar; nenit 16, pika 4, germat: “a”, “b”, “c”, “ç”, dhe pikat 5 dhe 6, të ligjit nr. 102/2015, “Për sektorin e gazit natyror”, të ndryshuar; nenit 28, pika 1, të ligjit nr. 9887, datë 10.3.2008, “Për mbrojtjen e të dhënave personale”, të ndryshuar, si dhe nenit 15 dhe 26, të “Rregullores për organizimin, funksionimin dhe procedurat e ERE-s”, të miratuar me vendimin e Bordit të Entit Rregullator të Energjisë (ERE) nr. 96, datë 17.6.2016, Bordi i ERE-s, në mbledhjen e tij të datës 21.12.2020, mbasi shqyrtoi relacionin nr. 135/11 prot., datë 16.12.2020, të Drejtorive Teknike,

konstatoi se:

- ERE, bazuar në përcaktimet e ligjit nr. 43/2015, “Për sektorin e energjisë elektrike”, të ndryshuar dhe ligjit nr. 102/2015, “Për sektorin e gazit natyror”, të ndryshuar, ka përgjegjësinë për monitorimin e tregut të energjisë elektrike dhe gazit natyror në Shqipëri.

- Bordi i Rregullatorëve të Komunitetit të Energjisë, në bashkëpunim me palët kontraktuese, me vendimin e datës 7 gusht 2020, bazuar në përcaktimet e rregullores nr. 1227/2011, “Mbi integritetin dhe transparencën e tregut me shumicë të energjisë” vendosi: Duke marrë në konsideratë vendimin nr. 2018/01/MC - EnC të Këshillit Ministerial të Komunitetit të Energjisë, “Mbi adoptimin nga palët kontraktuese të rregullores nr. 1227/2011 ‘Për integritetin dhe transparencën e tregut me shumicë të energjisë (REMIT)’”.

- Rregullorja për integritetin dhe transparencën e tregut të energjisë me shumicë (REMIT) përcakton kriteret që ndalojnë praktikat abuzive që mund të ndodhin dhe të ndikojnë në tregjet me shumicë të energjisë. Në të njëjtën kohë, REMIT-i ndihmon në funksionimin e duhur të këtyre tregjeve, duke marrë parasysh karakteristikat e tyre specifike.

- Drafti i përgatitur i rregullores (REMIT), është i ndërtuar në 6 (gjashtë) krerë:

1. Dispozita të përgjithshme: Në këtë kre të rregullores përcaktohen fusha e veprimit të saj, termat e përdorur, si edhe elemente të tjera të përgjithshme.

2. Ndalimi i tregtimit dhe detyrimi për publikim të të dhënave: Në këtë kre, ndër të tjera përcaktohen, ndalimet e vendosura ndaj personave që kanë informacion të brendshëm në lidhje me një produkt të energjisë në tregun me shumicë, detyrimi për publikimin e të dhënave nga ana e pjesëmarrësve të tregut, si dhe ndalimin e çdo angazhimi apo përpjekjeje për t’u përfshirë në manipulimin e tregut të energjisë me shumicë.

3. monitorimi dhe regjistrimi i pjesëmarrësve në treg: Në këtë kre përcaktohet se ERE do të monitorojë aktivitetin tregtar të produkteve të energjisë me shumicë për të zbuluar dhe parandaluar tregtinë bazuar në informacionin e brendshëm dhe manipulimin e tregut në vend, si dhe detyrimin e pjesëmarrësve të tregut për t’u regjistruar pranë ERE-s, në bazë të afateve të përcaktuara.

4. Informacionet konfidenciale: Në këtë kre parashikohet mbrojtja e të dhënave dhe konfidencialiteti i tyre sipas përcaktimeve ligjore në fuqi.

5. Monitorimi, hetimi administrativ dhe masat administrative: Ky kre përcakton se ERE, në përputhje me kompetencat e dhëna nga ligji nr. 43/2015, “Për sektorin e energjisë elektrike”, i ndryshuar, si dhe ligji nr. 102/2015 “Për sektorin e gazit natyror”, i ndryshuar, do të ndër marrë masa

për monitorimin dhe hetimin administrativ në lidhje me ndalimet dhe kërkesat e kësaj rregulloreje, të cilat do të ushtrohen në mënyrë direkte ose në bashkëpunim me institucione të tjera.

6. Dispozitat përfundimtare: Në këtë kre të fundit përcaktohet e drejta e ERE për të ndryshuar dispozitat e kësaj rregulloreje, interpretimi i saj dhe hyrja në fuqi.

- REMIT-i do të përcaktojë në mënyrë të detajuar mënyrën dhe procedurat që do të ndiqen nga ERE për monitorimin e funksionimit të tregut me shumicë të energjisë, si dhe veprimtari të caktuara të pjesëmarrësve në këtë treg, në funksion të eliminimit të abuzimit nëpërmjet zhvillimit të tij, nxitjes së konkurrencës dhe aplikimit të standardeve të transparencës.

- Rregullorja në shtojcën A, do të përcaktojë formate të sakta për informacionin që do të dorëzojnë dhe paraqesin në ERE, si dhe në Bordin e Rregullatorëve të Komunitetit të Energjisë, pjesëmarrësit në tregun me shumicë të energjisë.

Për gjithë sa më sipër, Bordi i ERE

Vendosi:

1. Fillimin e procedurës për miratimin e drafit të “Rregullores për integritetin dhe transparencën e tregut me shumicë të energjisë” (REMIT).

2. Drejtoria e Monitorimit të Tregut dhe Inspektimeve të njoftojë palët e interesit për vendimin e Bordit të ERE-s.

Ky vendim hyn në fuqi menjëherë.

Për këtë vendim mund të kërkohet rishikim në ERE brenda 7 ditëve kalendarike, si dhe mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETAR
Petrit Ahmeti